

河  
防  
疏  
略

河防疏畧卷之七

義烏朱之錫梅麓甫著

濟南李之芳鄴園甫定

稽山後學徐沁埜公輯

特叅藐玩道臣疏

題爲揚清尤先激濁開報屢催不前特叅藐玩道臣  
以昭懲儆事竊惟河工一事原爲任怨之府故玩  
公避怨者臣之所不取而營私歛怨者亦臣之所  
不容貸也臣河屬遼瀾各官劣迹或得之於文移  
或得之於告發此外則惟藩臬道廳等官之開報

是據十五年歲終舉劾臣以河南河工最繁屢檄該省行取劣員全無一人開報夫因河政以累民者事非得已雖怨讟屢至自不足恤如果藉端自潤貽玷官箴而亦縱焉不問其何以愜公論而慰輿情乎倘曰實無其人則府廳印河指不勝屈豈盡一一曾史而況別有發覺者又正不乏乎管河道徐必遠尤屬專司各官曰無劣員該道亦曰無劣員則其平日之覺察甚疎不待問而知也相應議處以爲來茲者戒其餘藩臬道廳等官皆有廉

察之責事關河政本臣專職乃各官視若贅疣呼  
之徒急應之愈緩且有揭送別衙門而全不以片  
紙隻字呈報及臣者除屢經申飭察取外倘仍前  
抗玩臣自以白簡繼之不敢少爲寬假也賢否事  
關大典所有泄玩道臣謹特疏糾叅伏乞

勅部嚴加議處施行

順治十六年六月十六日題七月初四日奉

旨徐必遠着議處具奏該部知道

甄別司道疏

題爲申明激勸大典事順治十六年閏三月初五日  
准吏部咨開文選考功清吏司案呈奉本部送吏  
科抄出該本部覆河道總督朱之錫題前事等因  
順治十六年二月初五日奉

旨該部議奏欽此欽遵抄出到部送司相應議覆案呈  
到部該臣等議得總河朱之錫疏稱前吏部覆臣  
特請歲行舉劾之例一疏內

勅下該督每年歲修告竣卽行舉劾奉有依議之

河防政界 卷之十一 三  
旨繼因督撫年終舉劾奉

旨停止不敢冒昧具

題今十五年河工又已報竣合無仍遵前

旨容臣照例分別舉刺以示勸懲再照管河佐貳等官  
亦應量擇其尤另疏薦錄至貪婪不職一體

題叅等語查十五年九月臣部覆漕督亢得時請明  
漕竣舉劾之例一疏內議總漕衙門似難與督撫  
事例同論相應仍舊舉劾奉有依議之

旨今河臣專司河道原就本年濬築之勤惰別其臧否

若無停奉劾則管河之官無以勸懲亦不便與督撫事例同論相應如其所請照舊舉行至管河佐貳等官官職雖微其河工之責成頗巨如有勤勞盡職者應行薦舉寧嚴毋濫其貪婪不職者聽河臣一體

題叅可也理合具覆恭候

命下臣部遵奉施行等因順治十六年三月十五日奉旨依議欽此欽遵抄出到部等因到臣准此爲照順治十五年歲修告竣臣隨行文各省查取賢否去後

今據冊報前來臣又細加簡覈較之舊額寧嚴毋濫總期于修明河政有裨勸懲而已其他非臣所敢泛及也所有應薦應劾司道謹臚列爲我

皇上陳之

計開

應薦司道官八員

夏鎮分司工部郎中顧大申湛識運以精  
心弘才敷爲實政堤韓莊而帑金無纖  
毫之損城夏鎮而運道有屏翰之資省



試以時曠冒爲之盡絕先勞罔懈廢墜  
無所不興

南旺分司工部主事劉元琬珪璋之品盤  
錯之材疏導泉源涓滴悉歸轉運節宣  
水利舳舻咸藉灌輸野宿而督大挑乘  
時而葺橋閘班班可紀

中河分司工部主事李縉明立志忠誠裨  
躬勤慎輻輳兩河之名險奔馳千里之  
長途卽董口挑河一節濡跡泥淖之中

課工風雨之下成勞尤自難泯

山東布政司左布政史記功蘊經濟之才  
貞紀綱之度按期而給防漕之餉士馬  
飽騰督屬而均力役之徵編徭畫一無  
忝諸司領袖允資共濟舟航

淮海道僉事霍炳才猷練達志向高明勞  
瘁弗辭克障懷襄之勢剔釐攸藉無遺  
銖兩之奸處繁劇而專力修防嚴督催  
而兼行節愛

分巡大梁道副使沈荃風裁振俗學行超  
羣惠及窮夫沿河多撫綏之譽才堪劇  
任一道有循卓之稱築堤賴以鳩僝植  
柳資其勸相

濟寧道副使楊奇烈鎮靜不浮嚴明有斷  
克爲伏莽之境緝弭多方濟當要會之  
衝供需立辦至于繕堤挑淺饋運催空  
勞績尤著

淮徐道僉事李世洽警敏得于天資厝施

濟以經術緝盜而渠凶就獲均徭而偏  
累頓甦兩河之轍跡時勤盈庭之獄訟  
無滯以上司道均應薦揚以昭鼓勵者  
也

應劾道官一員

天津道副使張道湜本官所轄天津迤南  
河道緣十五年五月內雨澤愆期來源  
微澁臣於時督同分司在臨清一帶築  
壩疏壅該屬東光南皮等縣本官足迹

不到撈濬無人及臣專委分司坐守迫  
催糧艘始獲漸次北進廳印等官先俱  
經臣叅處在案本官分轄所寄漫不關  
心何辭溺職此一官者相應照玩誤例  
議處者也伏乞

皇上勅部再加覆覈如果臣言不謬將顧大申等酌量  
敘錄張道湜照例議處所裨河道非淺鮮矣

順治十六年八月初四日題本月二十七日奉  
旨吏部知道

舉劾有司疏

題爲申明激勸大典事順治十六年閏三月初五日  
准吏部咨開文選考功清吏司案呈奉本部送吏  
科抄出該本部覆河道總督朱之錫題前事等因  
順治十六年二月初五日奉

旨該部議奏欽此欽遵抄出到部送司相應議覆案呈  
到部該臣等議得總河朱之錫疏稱前吏部覆臣  
特請歲行舉劾之例一疏內

勅下該督每年歲修告竣卽行舉劾奉有依議行之

河防政略 卷之十  
旨繼因督撫年終舉劾奉

旨停止不敢冒昧具

題今十五年河工又已報竣合無仍遵前

旨容臣照例分別舉刺以示勸懲再照管河佐貳等官亦應量擇其尤另疏薦錄至貪婪不職一體

題叅等語查十五年九月臣部覆漕督亢得時請明漕竣舉劾之例一疏內議總漕衙門似難與督撫事例同論相應仍舊舉劾奉有依議之

旨今河臣專司河道原就本年濬築之勤惰別其臧否

若概停舉劾則管河之官無以勸懲亦不便與督撫事例同論相應如其所請照舊舉行至管河佐貳等官官職雖微其河工之責成頗巨如有勤勞盡職者應行薦舉寧嚴毋濫其貪婪不職者聽河臣一體

題叅可也理合具覆恭候

命下臣部遵奉施行等因順治十六年三月十五日奉旨依議欽此欽遵抄出到部移咨到臣准此爲照順治十五年歲修告竣除司道另疏甄別外臣隨牌行



各司道將所屬印河等官造報賢否去後今據各司道冊報前來臣又細加覆覈於河道無關者卽他政超羣不敢濫入薦額於河道有裨者雖他事難料不忍遽沒成勞較之舊例寧嚴無濫至于敗檢溺職照揭叅處所有應薦有司十六員應劾有司四員謹臚列爲我

皇上陳之

計開

應薦有司一十六員

兗州府運河同知佟養鉅識歷久而彌精  
才四應而不置僨運則片帆無阻修河  
則餘力不遺卓然河吏之冠

開封府北河同知張爾翮竭蹶防數百里  
之河功難忘於曲徙咄嗟禦雷家集之  
變帑不費於纖毫

開封府南河同知趙汝斌周防而甘心盡  
瘁視河事寧啻謀家遇險而極力爭衡  
轉危機頓成順軌

淮安府徐屬同知魏裔魯英敏絕倫慈和  
協衆荒度周而綢繆獨預堤埽輦而汎  
濫皆馴

淮安府邳宿同知孫裔昌防淤淺以疏運  
治堤埽以禦衝精神幾竭於兩河憂瘁  
靡遑于片晷

兗州府推官趙開雍案理平徭部屋鮮偏  
枯之累法嚴祛蠹河濱讐盤踞之奸

淮安府推官俞有章剔釐河弊有摘奸發

伏之才協贊急工効捍患禦災之力

高郵州知州吳之俊老成者其度振作者  
其才當河湖並漲之秋著捍禦安流之  
績

封丘縣知縣余縉學識通明操修雅飭荒  
邑依之若慈母大工賴以爲長城

儀封縣知縣崔維雅剏裁無滯鼓勵有方  
挑引河而廻將倒之濶廣植柳而儲不  
時之用

尉氏縣知縣高桂調夫則咄嗟而應輸料  
則輻輳而前倜儻既見通才安詳尤徵  
定力

沛縣知縣郭維新英明集事愷悌宜民夫  
料之輸委獨先河漕之疏通可恃

嶧縣知縣黃甲第以凋疲之衆當衝劇之  
區撫循與督責兼行民隱並河工兩賴  
曲阜縣知縣孔胤淳孝友宜家恪勤敷治  
覈工食則羣夫果腹疏泉源則衆派湧

流

嘉祥縣知縣張枏撫字存心先勞蒞政夫  
食嚴漏卮之弊河工勤徹土之謀

祥符縣知縣劉朝宗清河集危險驟生一  
呼而人夫立集搶救時變遷無定屢應  
而柳料不窮以上有司均應薦揚以昭  
鼓勸者也

應劾有司四員

歸德府管河通判高璧劣蹟

一本官該管商虞考等處河夫一千餘  
名每月每一火頭索常例銀三錢每  
月約得銀三十餘兩交書辦趙名  
門子姚顯收訖夫頭張清宇總甲槐  
詳吳國春証

一本官擅收納紙書辦黃應召等五十  
名指稱公費每一名納銀三兩共得  
銀一百餘兩黃應召并董玉所証

一本官所轄看堤堡夫五十名每名工

食銀七兩五錢支發未明堡夫舍怨

陳天祿王友鳳証

一本官指劉家樓芝蔴莊二渡口每月  
差聶快手趙瑞乾赴渡口索常例錢  
數十串焦小堂劉士吉等証

新鄭縣知縣馮嗣京劣蹟

一本官指河夫雜項爲名於本年內每  
畝地攤派細徵銀三分共四百頃通  
追得銀一千二百兩聽信蠹書趙碧



侵扣指稱存留仍不給散致閃貧夫  
大怨派銀總書戴明乾審証

一本官於本年內差快役張祥之領募  
夫工銀五十六兩聽信蠹書趙碧扣  
侵措抑毫未給發領役張祥之並夫  
頭等証

一本官聽信兵書沈光燦指稱協濟名  
色加徵馬銀一百兩縱役侵肥公直  
趙天真等証此二官者應照貪例革

職提問者也

朝城縣知縣惠光先劣蹟

一本官年近六旬性多執拘往往偏護  
衙役不能與地方相安

一本官凡派河夫富豪之家從不應役  
偏累貧民一月一換百姓每苦僉報  
之擾此一官者應照不謹例議處者  
也

許州知州汪潛劣蹟

一本官賦性悠忽凡奉到公文不卽察  
行悉置高閣至河患益屬漠視緩急  
無賴

一本官近得目疾每登堂理事動輒呼  
張爲李以致胥役藐玩事多廢弛

一本官起解河夫止以空文搪塞並未  
逐名點查故夫多不到貽誤工程此  
一官者應照不及例議處者也伏乞

勅部再加覆覈如果臣言不謬將佟養鉅等酌量敘錄

高璧等分別議處庶勸懲聿彰河事有賴矣

順治十六年八月初四日題本月二十七日奉

旨吏部知道

舉劾佐貳疏

題爲申明激勸大典事順治十六年閏三月初五日  
准吏部咨開文選考功清吏司案呈奉本部送吏  
科抄出該本部覆河道總督朱之錫題前事等因  
順治十六年二月初五日奉

旨該部議奏欽此欽遵抄出到部送司相應議覆案呈  
到部該臣等議得總河朱之錫疏稱前吏部覆臣  
特請歲行舉劾之例一疏內

勅下該督每年歲修告竣卽行舉劾奉有依議行之

旨繼因督撫年終舉劾奉

旨停止不敢冒昧具

題今十五年河工又已報竣合無仍遵前

旨容臣照例分別舉刺以示勸懲再照管河佐貳等官亦應量擇其尤另疏薦錄至貪婪不職一體

題叅等語查十五年九月臣部覆漕督亢得時請明漕竣舉劾之例一疏內議總漕衙門似難與督撫事例同論相應仍舊舉劾奉有依議之

旨今河臣專司河道原就本年濬築之勤惰別其臧否

若概停舉劾則管河之官無以勸懲亦不便與督撫事例同論相應如其所請照舊舉行至管河佐貳等官官職雖微其河工之責成頗巨如有勤勞盡職者應行薦舉寧嚴毋濫其貪婪不職者聽河臣一體

題叅可也理合具覆恭候

命下臣部遵奉施行等因順治十六年三月十五日奉旨依議欽此欽遵抄出到部移咨到臣准此爲照十五年歲修告竣除司道有司另疏甄別外臣隨牌行

各司道將所屬州縣佐貳官查造賢否去後今據  
各司道冊報前來臣細加覆檢據照原開冊揭分  
別舉劾論官職雖屬么臈計勸懲頗有關係正不  
敢以其微員而忽之也所有應薦佐貳官六員應  
劾佐貳官六員謹照例臚列開坐上

聞

計開

應薦佐貳官六員

濟寧州同知范有明委管修濬供應兵差



成勞丕著

祥符縣縣丞顧玉鉉拮据河干旣勞且苦  
中牟縣縣丞張行生小心供職殫力河防  
商丘縣主簿葉世秀董率羣夫勤勞可錄  
陽穀縣主簿石璿修濬得宜克勝厥任  
寶應縣主簿褚建修築隄防不辭勞勩以  
上佐貳相應薦揚以備優錄者也

應劾佐貳官六員

陳留縣縣丞鄭明時劣蹟

一本官於十四年分管遙堤修築夫八百餘名內有火頭夫頭杵夫等一百六十餘名謂之輕頭本官聽信積書李一中蠹役班從禹等每派輕頭一名索銀二三錢不等共得銀四十餘兩官役分肥李一中班從禹審証

一本官管南北兩岸堡夫一十二名每季行禮銀一兩二錢堡夫賈一龍証單縣主簿任熙劣蹟

一本官管徭夫三百餘名派定六牌每  
牌扣夫頭錢一千文與總甲高進才  
等分肥委總王國用謝祥審証

一本官堤夫內派水汛六名及報水時  
仍令散夫打報坐占本年水汛半年  
工食與書辦王景皂頭曾惟一分肥  
張堯尹覺宇周文科等証

一本縣額設舖夫三十九名守堤本官  
聽信夫頭党君用借言查點失悞每

名索常例銀二錢約得七兩八錢與  
党君用分肥柴光顯証此二官者應  
照貪例革職提問者也

虞城縣主簿馮曉本官言貌猥鄙約束無  
術以致夫譁莫禁且賦性慵惰時入  
伏秋猶然偷安私署闌葺已極誤工  
可虞

嶧縣縣丞鄒國英本官挂名河員潛蹤衙  
舍履任七載寸長無錄質以河務茫

然不知

儀封縣主簿楊復本官神衰才短董率無能該管河勢變遷束手憂惶復盲目雖履任無幾河事殷煩豈可姑容貽悞此三官者應照不及例議處者也

徐州下河州判劉應斌本官年逾六旬步履艱難屢以病告河防劇務非暮氣所能驅勉此一官者應照年老例議

處者也伏乞

勅部覆加查覈如果臣言不謬將范有明等酌量敘錄  
鄭明時等分別議處庶功罪明而人心益知所勸  
戒矣

順治十六年八月初四日題本月二十七日奉

旨該部知道

河防疏畧卷之八

義烏朱之錫梅麓甫著

濟南李之芳鄴園甫定

稽山後學徐沁埜公輯

題叅失誤緯失各官疏

題爲緊急軍務事據兗東道劉世傑呈稱照得本道  
自七月初八等日節蒙河撫按三院憲牌准兵部  
咨俱同前事照得大兵南進所用緯夫數目本部  
屢經咨劄該撫道飛檄所屬經過地方照數預備  
今大兵星夜前往所需船隻并應用緯夫相應亟

催嚴行該道府督率該地方官親詣河干查點明  
確如數預備不許推諉驛官致滋貽誤聽本部差  
去圖郎中取討卽照數應付若本驛繹夫不足該  
道府卽撥附近隣邑州縣協濟如有遲延短少本  
部郎中卽行指名報部定以違悞軍機該地方官  
并道府一併叅處等因到院准此合行亟催爲此  
牌仰本道卽便轉行沿河地方各官如數預備不  
許推諉驛官若驛夫不足卽撥臨近州縣協濟如  
有遲悞揭報叅處等因蒙此查得大兵船隻需夫



甚多經過本道所屬嶧縣之萬家驛僅止額夫三百名萬難足用卽飛檄該府并飭附近滕縣與嶧縣遵照協濟外至本月十七日辰時蒙督撫部院憲牌據德州申稱兵部圖郎中于十三日辰時已到德州口稱大兵船隻于十五日可到絳夫需用一萬等因蒙此查得兵船需夫一萬無論萬家驛驛夫不足卽附近之滕嶧二縣亦難催備隨將前奉各院憲行催備南來凱旋羅大將軍兵船絳夫共一萬名嚴催備用查得沂州計夫二千名郯城

二千名滕縣一千七百名嶧縣一千七百名費縣  
一千一百名鄒縣一千五百名共足一萬名一面  
申呈各院卽一面差役守催仍勒限齊集本道親  
詣點查接替職世傑卽於本月二十三日自沂州  
起身至下莊催查沂鄒費三縣夫役而三縣人夫  
一名未到至晚到蘭陵係沂鄒費三縣適中之地  
查各縣夫役仍然未到止有沂州知州田生玉在  
蘭陵點查夫役尚未齊備隨差役分頭接催本道  
在蘭陵守候二十五日酉時忽據嶧縣申稱蒙本

道憲票仰縣官吏卽將前備夫一千七百名該縣  
照數點齊不許短少一名限二十五日齊集馬蘭  
屯伺候本道點查接替等因蒙此該卑職隨於本  
月二十四日卽親詣馬蘭屯除點查萬家驛驛夫  
八十名外其協濟萬家驛派備民夫照數查點到  
夫一千三百零七名其未到人夫嚴責各役拘拏  
間於本月二十五日候本道按臨馬蘭屯查點緯  
夫而本日午刻兵船卽抵臺莊卑職將前點過人  
夫親督臺莊接替因馬蘭屯至臺莊二十餘里途

路逃避者有之及卑職覆查僅存現夫一千五十  
名及散夫時內有老幼不堪人夫五十名前站逐  
去止交現夫一千名卑縣仍親謁領兵大元帥定  
南達將軍備陳嶧苦心甚惻然具有嶧縣到夫一  
千名其結收去其各州縣協濟人夫並未解到而  
兵船續至立待需夫探得憲臺按臨蘭陵點夫目  
穿疾呼一時難至卑職手足莫措懇乞憲臺飛檄  
協濟州縣刻將應備人夫照數點足星夜趨赴臺  
莊接替以濟軍機等情據此本道卽單騎至馬蘭

屯據本道催夫快手王天錫報稱大將軍船已過  
臺莊止有兵船隨後續過所有續到夫役隨到隨  
替兵船並無停泊等情據此本道卽駐臨河之石  
佛寺嚴催各縣夫役接替間二十六日寅時據費  
縣申稱蒙本道憲票仰縣備夫一千一百名卑職  
於二十三日點過絳夫六百名委捕官押發前行  
停宿南鄉中村聽候查點忽接捕官差役具報於  
二十四日晚二更已盡突然鼓譟四起連衝呐喊  
闔村男婦驚慌嗣後於二十五日天明捕官查點

緯夫已逃去二百三十七名卑職於二十五日親  
至中村隨據本處鄉民里老呈報吶喊驚竄緣由  
到職據此事出變異關係地方細查俱係南山一  
帶撫民倡造訛言率衆逃走方今應付甚急豈容  
短少夫役卑職急欲回縣料理再派又恐未派者  
騷動而在途者潰散事勢窮促叅處臨頭除一面  
招徠補救外爲此激切痛哭陳情懇乞鑒燭前情  
宏開生路等情據此二十六日未時又據滕縣申  
稱蒙本道憲票仰縣官吏卽將前備夫一千七百

名該縣照數點齊馬蘭屯伺候本道點查接替等  
因蒙此遵行已照數催備於七月二十日點查止  
拘到夫九百四十名差役押赴臨城委縣丞陳斌  
再行查點卑職於二十四日親赴臨城率領各夫  
前來不意無知小民誤聽訛傳乘夜逃去夫六百  
六十名止存夫二百八十名卑職二十六日押赴  
臺莊交正紅旗明甲暗甲一喇氣收去夫三十八  
名鑲藍旗明甲暗甲哈申得去夫四十三名鑲白  
旗明甲暗甲得兒杜收去夫九十九名正白旗收

去夫三十二名鑲紅旗收去夫一十九名共收去夫二百三十一名尚存老弱夫四十九名未收各旗逐去緣係軍機重務擬合據實申報等情據此又據費縣稟報卑職於本月二十三日點發夫六百名委典史裴爾玉押解至中村地方離城一百二十里又於本月二十四日點到夫五百名卑職同縣丞林弘先親督至中村不料於本月二十四五兩夜突遭撫民倡造訛言以致各夫吶喊鼓譟逃竄西南山去除已經申報外尚存夫二百餘名



縣丞典史押至項城卑職匍匐前來至蘭陵叩訴  
憲臺詎料滿兵稍夫盡行驚散事干民變併係失  
誤卑職同縣丞典史星夜回縣安撫百姓固守城  
池無憑押解等情據此又據沂州申稱蒙本道憲  
票仰州官吏即將前緯夫二千名押至馬蘭屯交  
替遵於本月二十四日在州點夫二千名卑職親  
押解至蘭陵集忽聞費縣撫民假造訛言以致費  
縣緯夫隨呐喊鼓譟逃竄山內卑州夫役聽此訛  
言卽逃回一千二百一十七名其餘緯夫卑州同

羅勝司巡檢王振烈督押至臺莊逐名復黜尚存  
絳夫七百八十三名送入關王廟內聽候接替卽  
時一齊吶喊衆夫盡皆逃走卑職無憑押解情願  
甘罪理合回報據此查得各兵船於二十七日過  
盡俱南下去訖具文呈報間於二十八日又據郟  
城縣申稱卑縣派備絳夫二千名卽差役催齊一  
千四百名於本月二十五日委糧官范士鎔先押  
赴馬蘭屯卑職隨同差官甄守志星赴蘭陵投見  
續據糧衙范士鎔稟稱押夫自重坊集起身行至

途中忽造謠言不是緯夫係提去當兵疑畏觀望  
不前職見情形勸諭催督二十六日已至邳境連  
峯山各夫齊住吃飯不走職同道廳差役尾後傳  
催意欲宿黃池公次早便起投道文工房又復回  
親催依舊不行各夫齊變四起吶喊糾合走回押  
差攔阻衙皂周運隆被捉毒毆竟無統紀併後到  
續發人夫蜂擁逃回天時昏暮勢難追拏事關大  
變合先具稟各等情到道據此看得征南兵船需  
夫一萬本道遵奉憲行不敢推諉驛官卽如數撥

沂州縣協濟檄行守催不啻舌敝頽禿親詣點查  
不啻心勞身瘁不意臨期接替惟嶧縣交夫千名  
滕縣交夫僅二百三十一名其餘人夫同沂州費  
縣郟城各申稱已催備押解中途因訛言逃散至  
郟縣距河干較遠人夫未到雖曰兵行神速未嘗  
時刻停泊愚民驚逃難以羈縻前往而接替未及  
沂州守申言其罪而本道又何敢爲之諱言也又  
何敢自爲求寬也相應據實呈明職世傑同守令  
各官候憲臺分別叅處至越過濟沛緯夫或批行

查明貴令夫役不到之州縣照數補其夫價一以償越站之勞一以懲奸玩之罪是在憲臺裁行等因據此又據濟寧道楊奇烈稟稱昨送大兵南下緯夫不意沛縣夏鎮臺莊並未替換竟將濟屬緯夫俱打過站已回者不過一半前職奇烈已行濟屬協夫州縣查報又行沿河地方加意收留報逍酬賞迄今尚無確數回復今聞各夫竟打越過宿遷地方但宿遷至南陽遠經數百里亦有逃回者路遠餓死打死淹死沿河不絕聞之不覺悽慘除

將越站及死夫數另行查報外若不稟請憲臺  
拯救則未回之夫斷難生還而將來之供應何賴  
等因據此又據濟寧州申稱蒙本府分派濟寧州  
備夫三千名鉅野縣協夫一千一百名鄆城縣協  
夫一千一百名嘉祥縣協夫八百名蒙此又蒙本  
府批據卑州申請北來大兵應用緯夫一萬緣由  
蒙批前奉濟寧道憲行已於本月十七日調魚臺  
金鄉單縣緯夫赴該州併站協送泗亭驛矣仰候  
飛檄三縣齊赴接替繳等因俱行到州蒙此查得

預備緯夫共有六縣協應矣卑州遵照派定數目  
星夜僱夫三千名分外多僱夫五百名以備不足  
之用至七月二十三日北來大元帥抵濟卑州之  
夫供應有餘其六縣協應之夫到與未到卑州不  
敢過而問焉於七月二十五日過濟訖至今八月  
初六日已逾旬日卑州遍查所僱緯夫歸來者不  
過一半查自濟寧至泗亭驛不過二百里往返不  
過四五日今逾旬日不返則前途無夫接替可知  
矣以致各夫枵腹挽緯竟無稅足之處其中保無

傷亡者乎痛念輓輓赤子何以堪命誠鄭圖不能  
繪賈淚不能乾者除一面遵奉憲文細行清查多  
差船隻載運糧糈星夜往南接救緯夫外擬合先  
行申報各等因到臣該臣看得南進大兵萬分緊  
急每站需用船夫一萬名俱出沿河州縣臣會同  
撫按節發令箭嚴催山東各道預集河干照站接  
替查兵船於七月二十二日晚至濟據濟寧道報  
稱用夫八千一百二十二名挽拽南下訖及旬日  
之後歸者尚復寥寥該道及濟寧州屢有呈稟意



其必係前途越送臣正在嚴檄確查間據兗東道  
劉世傑詳稱該驛驛夫見在八十名其餘俱派嶧  
縣費縣滕縣沂州郯城鄒縣等州縣協濟不期催  
到人夫臨期疑畏不前夫數衆多一呼盡散以致  
接替不及自甘叅處臣惟軍機至急急則不暇兩  
全綽夫至苦苦則不容偏累乃兗東州縣催督無  
方紛紛逃避致令濟寧綽夫越境代僵雖兵船順  
流幸而無滯而其失誤之罪終不能爲各官解也  
查該道所屬惟嶧縣知縣黃甲第備夫一千零五

十名滕縣知縣吳起鳳除逃去外僅存夫二百八十名其沂州知州田生玉郟城縣知縣張翼費縣知縣程九萬各夫俱經逃散鄒縣知縣周嗣昌緣距河較遠夫亦未到除濟寧越站各夫臣已一面行州差撥船隻載運糧糈前迎賑救去後所有兗東道劉世傑併該屬州縣失誤各官相應

題請

勅部分別議處至於此後緝夫應行商酌事宜容臣移會撫按另議具

題外臣謹會同撫臣許及秀按臣程衡合詞密

題伏乞

勅部議覆施行

順治十六年八月十一日題  
月  
日奉

旨

議恤緯夫苦累疏

題爲緯夫苦累已極亟議變通以昭

皇仁以恤民隱事臣自蒞任之後沿河士民無不以緯夫疾苦號泣控懇各道呈詳有稱陸路屢蒙裁減河干日議加增民生敝壞不可收拾應貼水手食米爲便者有稱以有限殘民受無限艱苦逆水量給鄉夫順水止給水手口糧者有稱民應一夫猶如赴湯蹈火情願每名緯夫出銀三錢以貼船家盤費者臣未嘗不深思熟慮疾首痛心然又仰體

國家軍行重事既不能停免不用又苦無策兩全以故未敢輕率入

告查順治八年內部覆直隸總督張存仁緯夫甚爲民累一疏內開經過船隻應用緯夫責成該驛應付等語十四年內部覆山東巡按繆正心沿河民困于役一疏內開頭號二號三號等船上水下水緯夫數目如有騷擾等情指名

題叅等語十五年內部覆順天巡按董國興民夫苦累難堪一疏內開調防大兵乘坐回空糧船止照

本船水手給米果不足用該驛僮兒不許捉派民夫等語是沿河民隱固已上徹

宸鑒而部臣博採條奏計所以甦恤之者亦既甚周矣然議者必曰凌虐需索據實指

叅惟是兵船以百十計跟役水手卽不下數千犖犖小民隻身克夫偶然同事之人亦皆漠無關切縱使飲痛以死父兄妻子望眼徒穿竟犯爲誰旣莫考其姓名又孰代爲質証况一家數口死者已矣生者謀食不給勢不能再捨餘生出身對簿爲有

司者亦將何所據而爲之伸雪寃抑乎議者又必曰該驛僱覓毋派民夫惟是每驛設夫或數十名至多或二三百名前差未回後差復到尚然不給一至兵船需夫少者數千甚而至於近萬無論驛遞錢糧有限船多人雜苦緒萬端州縣官按里派捉猶且裹足不前今日驛官僱覓豈能濟事是名雖少變而絳夫受病之實寃竟何追於萬一乎此二者皆言之甚美而行之實難者也夫百姓力役公家分所應爾苟行之得法不過用民數日牽挽

之力何得言勞奈何乘船者非不恪遵禮法而駕  
船水手率多無賴或倚恃氣燄或挑撥兵丁凌虐  
鄉愚恣行魚肉以致沿河州縣皮骨僅存其苦有  
非一言盡者臣請得條述而縷陳之一曰守候之  
苦沿河驛站大約相去百里之間如用夫數千除  
本州縣外仍須隣封協濟十餘日前繫繫成群封  
鎖古廟臥眠飲食不得自由餼糧幾何又將垂盡  
其不堪者一一曰趕緯之苦每船之夫繩索相連  
偃僕邪許無分晝夜饑不得食勞不得休船上之



人方且輪番持棍任情鞭撻至於折肢體喪殘生  
者在在有之其不堪者二一日越站之苦各夫筋  
力有限盤費有限萬一前路緯夫未集竟將舊夫  
打過饑餓困憊殘喘如絲幸而得歸乞食無所其  
不堪者三一日順水之苦黃運兩河水勢建瓴順  
流直下夫雖疾驅不及船速反曳緯索隨後奔追  
涉水而行一夫失足衆夫隨之撈救無人竟委魚  
腹其不堪者四一日攘奪之苦緯夫跋涉遠道携  
帶衣糧以備往返間有水手跟役恃強勒取以困

頓之餘生加饑寒之迫體其不爲溝中之瘠者幾  
何其不堪者五一曰強帶之苦前途驛夫更換已  
足復有狠毒船棍擅留舊夫勒其銀錢資其氣力  
或盛夏而幽之船底或風雨而驅之當先踰越數  
站歸者無幾其不堪者六此皆臣得於訪聞與據  
之詳冊之大槩也雖未必節次皆然然間一有之  
則是驅無罪之民就必死之地此在地方豐寧尚  
且上軫

容懷多方體恤而况沿河一帶當此災傷之餘加以馬

匹經行軍需徵辦偏累已多若緯夫一節再不少  
爲斟酌無論百姓視爲畏途將來鞭朴徒加終不  
易集且恐窮迫無聊逃亡奔竄其可憂又有甚者  
臣前是尚不敢有所瀆陳今者軍興旁午爲臣子  
者恨不能荷戟前驅奮身効力何敢妄爲姑息之  
請獨是臣駐劄河干灼見時勢萬不容已倘緘默  
不言則是臣仰負

皇上如傷之仁而坐誤地方也臣罪滋大故雖計無所  
出而不敢不以上

聞耳今於未便更張之中曲爲調劑之術謬抒蠡見約  
有四端一者數目宜節官兵登船之日頭號船約  
載若干人用夫若干二號三號船各約載若干人  
用夫若干一面卽將人數船數造冊報部庶不致  
乘坐太濫省一船卽可省一船之夫且以裝載多  
寡分別船之大小而冒稱大船藉端多索之弊亦  
可少絕民困亦得因之少蘇矣一者稽察宜嚴官  
兵用船或自一隻以至百隻不妨卽以先後次第  
編爲號數各記船戶頭舵姓名造冊報部每船十

隻責成一頭領官專司巡察換夫之時州縣照依  
號數以次給散各船戶出一收夫小單存照而每  
船絳夫之內僉立夫頭一二名照管本絳如有死  
亡攘奪等弊查問夫頭行提船戶嚴加根究庶幾  
紛紜揉雜之中事後猶可查攷萬一而人情畧知  
顧忌矣一者水勢宜酌逆水上行必藉絳挽之力  
至於順流船行甚易况各船原有水手除上水定  
數給夫下水則厚加津貼以資食用似於船戶亦  
屬便益若恐站銀不足則東堯道潘超先每名絳

夫量貼盤費之詳亦出民間情願可否聽從其便再行酌議如是則南來北往河流維均而夫力減半亦可以少示休養矣一者緩急宜分緊急大兵與尋常換班者自是不同似應臨期酌定無論上水下水一槩給夫以速軍務若其餘緩差仍應遵照部覆順天巡按董國興疏議乘坐回空止照本船水手絳夫名數日給食米不許派捉民夫萬一自南北上乘坐民船下水止行給米上水酌議減用另聽部議庶沿河有司遵行畫一而軍機民隱

兩有所賴矣臣愚昧所及暫論如此是否有濟萬  
一倘

廟堂之上更有良畫可以兩全是又地方無疆之福也  
事關地方疾苦情形臣謹會同山東巡撫臣許及  
秀巡按臣程銜合詞具

題如果臣言可採伏乞

皇上睿鑒

勅部議覆施行冒昧敷陳字稍逾格統祈

恩宥

順治十六年八月二十一日題九月十七日奉

旨該部詳議具奏

兵部覆前疏

題爲絳夫苦累已極等事車駕清吏司案呈奉本部  
送兵科抄出總督河道朱之錫題前事等因奉

旨該部詳議具奏欽此欽遵抄出到部送司奉此相應  
議覆案呈到部該臣等議得總河臣朱之錫疏稱  
絳夫苦累六款并陳救苦四議其數目宜節一欵  
內稱官兵登船之日頭號二號三號等船各約載



若干人用夫若干名等語查大兵出征乘坐船隻并應用絳夫數目向係臣部戶部酌量軍行緩急差官前往分發船隻絳夫今該督議定數前來應照臣部前覆直省督臣李蔭祖

題定頭號船坐六十人二號船坐四十五人三號船坐三十人之例遵行仍令地方官造冊報部以憑稽察不得以小克大藉端濫索其稽察宜嚴一款內稱船隻以先後次第編爲號數各記船戶頭舵姓名造冊報部每船十隻責成一頭領官專司巡

察換夫之時州縣照依號數以次給散各船戶出  
一收夫小單存照等語查軍行自有八旗船論旗  
先後按次序行不便編號造冊至稱死亾搶奪等  
弊應責成治河各道差的當員役巡察酌立夫頭  
照管本緯如有持棍趕緯搶奪強帶越站以致死  
亡者該地方官卽限究行究船戶及被害姓名立  
時呈報該撫按卽指名

題叅以憑從重處治其水勢宜酌緩急宜分二款內  
稱逆水上行必借緯挽順流船行甚易上水定數

給夫下水厚加津貼又稱緊急大兵與尋常換班  
不同無論上水下水一槩給夫以速軍務等語查  
大兵遇有緊急征勦自應如議給夫其餘駐防換  
班官兵等項需用船隻不係緊急軍務者仍照臣  
部覆順天按臣董國興

題定例止用本船水手照例給米至大兵自南回北  
乘坐民船止用該驛額設驛夫無客另議津貼奉  
旨依議

題補南河同知疏

題爲

請補河官以重河防事順治十六年八月二十五日該  
臣咨會河南撫臣賈漢復爲移商

題補河官以收駕輕之效以免坐誤之虞事照得河  
性湍悍衝潰時聞蓋排山倒海之勢不可以人力  
爭者有之矣未有人力不盡而能晏然無事者也  
然河防之理原係專家故非久歷不能深知非深  
知不能取效况歷來河患惟中州爲尤甚則爲官

擇人尤萬萬所宜致慎者查河南緊要河官總其事者爲河道次則北河同知尤爲關係今管河道徐必遠已經議處北河同知張爾翮又報陞任而臨河一二印官新任尤多夫道官係新手猶曰有廳官分任之也廳官係新手猶曰有道官指畫之也今則悉行更換初任印官更復茫無頭緒先事荒度臨期搶修此皆有安危爭於呼吸之勢而竟無一人可以倚賴及至事後補救所費工程豈止什伯已也但北河同知

毛陞府正難以議

留查得儀封縣知縣崔維雅修防三家莊工鼓勵  
有方情形洞悉揆之往事似堪任以北河同知之  
職且新陞淮安府同知官秩亦復相應但彼中官  
評貴部院耳目最近知之更詳

題留一事干係綦重本部院未敢專主可否會

題相應移商爲此合咨貴部院煩爲查照如崔維雅  
堪以

題補卽賜移示以便會同具

題庶駕輕就熟責效可期較之生手嘗試者得失判

然矣移咨去後隨准回稱爲照承大咨因北河同知缺員議將儀封陞任知縣崔維雅

題補此缺并詢及本官官評本部院查此官在任裁柳修河催科辦賦任久勞深幹濟才也今以之

題補北河同知誠如貴部院所謂駕輕就熟等故可期但事關河務應候貴部院繕疏主稿會

題者也相應回覆等因到臣該臣看得治河一官貴於諳習臣前慎重河工職守一疏已經

題明覆奉

俞旨欽遵在案況歷來河患中州爲甚乃該省管河道  
北河同知俱係新任歸德通判亦復經臣叅處臣  
正切杞憂移會撫臣賈漢復從長酌議而南河同  
知趙汝斌又以積勞病故告矣一道三廳悉更生  
手無論來者果否勤敏總未可知即使凡百究心  
亦必需之月日河工水汛節序相催事機之來間  
不容髮是何可以嘗試僥倖爲也查原任儀封縣  
知縣崔維雅任內修防歷著成績且新任淮安府  
同知以之改補南河同知銜亦相當臣恐所見不



確又經咨會撫臣移覆僉同合無請

勅吏部將崔維雅改補趙汝斌員缺一轉移間而素所  
通曉較之茫無頭緒者得失不啻徑庭矣臣謹會  
同河南撫臣賈漢復合詞具

題伏乞

勅部議覆施行

順治十六年九月十六日題本月二十八日奉  
旨吏部議奏

吏部覆前疏

題爲

請補河官以重河防事文選清吏司案呈奉本部送吏科抄出總督河道朱之錫題前事等因奉

旨吏部議奏欽此欽遵抄部送司相應議覆案呈到部該臣等議得河道總督朱之錫疏稱治河之官貴於諳習歷來河患中州特甚乃該省河道北河同知俱更生手而南河同知趙汝斌又以積勞病故查原任儀封知縣崔維雅任內修防歷著成績新陞淮安同知以之改補南河同知銜亦相當等語

查崔維雅於十六年三月內已陞淮安同知今河  
臣既將崔維雅

請補開封府同知銜品相當會同撫臣具

題前來相應如其所請崔維雅准改河南開封府同  
知其淮安府同知員缺另行選補可也奉

旨依議